



PRAKATA



**MENTERI KEWANGAN
MALAYSIA**

Dokumen ini menyediakan maklumat lengkap dasar fiskal Kerajaan Persekutuan pada 2019-2020. Dokumen ini memberi kefahaman kepada pembaca mengenai parameter fiskal terkini seperti hasil, perbelanjaan, hutang dan kedudukan kewangan sektor awam disatukan yang meliputi pelbagai peringkat kerajaan serta syarikat awam. Laporan Tinjauan Fiskal dan Anggaran Hasil Kerajaan Persekutuan memberi pengetahuan kepada rakyat dan penganalisis tentang operasi dan risiko fiskal yang berkaitan.

Tahun ini merupakan tahun kedua Kerajaan menerbitkan dokumen ini dalam format sedemikian. Laporan ini bertujuan meningkatkan tahap ketelusan dalam sektor awam. Laporan ini juga diterbitkan untuk meningkatkan komunikasi dan kefahaman awam berhubung dasar fiskal.

Kerajaan kekal komited untuk mengurangkan defisit fiskal dan tahap hutang berbanding KDNK. Langkah memperbaiki kedudukan fiskal Kerajaan diperlukan untuk mencapai kestabilan makroekonomi dan menyokong agenda pembangunan negara dalam jangka masa panjang. Dalam hal ini, Jawatankuasa Pembaharuan Cukai (TRC) telah ditubuhkan untuk membuat kajian menyeluruh mengenai sistem percukaian Malaysia melalui rasionalisasi pelbagai insentif cukai, memperkemas pentadbiran cukai dan meneroka sumber hasil baharu yang mampan tanpa membebankan rakyat. Sementara itu, Jawatankuasa Pengurusan Hutang (DMC) telah ditubuhkan untuk menyelaraskan pengurusan semua hutang, jaminan dan liabiliti Kerajaan Persekutuan.

Sebagai sebahagian daripada pembaharuan institusi, Kerajaan akan menambah baik proses belanjawan berasaskan sifar dalam pengagihan sumber di samping memperkemas proses tender terbuka. Program dan projek berimpak tinggi akan diberi keutamaan sementara pembaharuan institusi akan membantu mengurangkan ketirisan. Kerajaan dijangka memperkenalkan Akta Perolehan Kerajaan pada tahun 2020 bertujuan menggalakkan tadbir urus yang baik dalam menguruskan perbelanjaan awam. Selain itu, Kerajaan sedang merangka Akta Tanggungjawab Fiskal yang dijangka dibentangkan pada tahun 2021 untuk memastikan kestabilan fiskal, ketelusan dan akauntabiliti dalam sektor awam.

Akhirnya sebagai sebuah negara perdagangan, Malaysia tidak terkecuali daripada kesan kelembapan pertumbuhan global secara serentak. Dalam persekitaran global yang mencabar, penting bagi Kerajaan mempunyai dasar yang fleksibel untuk memastikan pertumbuhan domestik terus kukuh seterusnya meningkatkan taraf hidup rakyat Malaysia. Kerajaan sentiasa memantau rapi semua perkembangan luaran dan akan bertindak mengikut keperluan bagi memastikan pertumbuhan ekonomi yang mampan.

Sayangi Malaysiaku!



LIM GUAN ENG

11 Oktober 2019